

→ DASAR & PENTADBIRAN

Syor bantuan MyBeras dalam bentuk wang

→ Salur dalam akaun BR1M elak berlaku ketirisan

Oleh Haryani Ngah
aryani@bh.com.my

► Seri Kembangan

Kementerian Pertanian dan Industri Asas Tani (MOA) mencadangkan bantuan untuk program MyBeras diberikan dalam bentuk wang dan disalurkan ke dalam akaun Bantuan Rakyat 1Malaysia (BR1M) bagi mengelak berlaku ketirisan.

Timbalan Menteri, Datuk Seri Tajuddin Abdul Rahman, berkata cadangan itu dibuat bagi mengelak berlaku ketirisan dan memastikan tiada penerima yang layak tercicir.

"Program MyBeras masih dalam kajian dan akan dilaksana dalam masa terdekat. Kita belum menetapkan tarikhnya lagi.

"Kita mengambil masa membuat keputusan. Ia masih di peringkat kajian bagi mendapat formula terbaik melaksanakannya.

"Cadangan terbaharu yang dibincangkan adalah kemungkinan kita memberi bantuan dalam bentuk wang yang dimasukkan ke dalam akaun BR1M. Cara ini dilihat tiada ketirisan," katanya pada Sam-

butan Hari Raya Lembaga Kemaajuan Ikan (LKIM), di Wisma LKIM, di sini, semalam.

Tajuddin berkata, kajian mengenai program MyBeras masih dibincangkan pada peringkat Kementerian.

Program MyBeras yang sepatutnya dilaksanakan pada 1 Jun lalu ditangguhkan bagi memberi ruang kepada penambahbaikan mekanisme pengagihan yang lebih menyeluruh dan bersepadu. Ia adalah pemberian 20 kilogram (kg) beras kepada keluarga miskin tegar setiap bulan yang diumumkan Perdana Menteri, Datuk Seri Najib Razak ketika pengubahsuaian Bajet 2016 Januari lalu.

Ambil serius wabak sakit kerongkong ayam

Dalam perkembangan lain, Tajuddin berkata, Kementerian memandang serius masalah wabak bronkitis berjangkit (IB) atau sakit kerongkong ayam.

"Pegawai veterinar sudah diarah turun padang melihat dan menyelesaikan masalah dihadapi.

"Kita mempunyai bekalan ayam yang mencukupi," katanya.

Berdasarkan laporan pegawai veterinar, wabak berpunca kerana ada penternak yang tidak mengambil vaksin untuk ayam mereka dengan alasan vaksin sedia ada tidak memberi sebarang kesan.

Untuk komen
e-mel ke bhnews@bh.com.my
atau di laman Facebook BH Online

Fakta
nombor

20 KILOGRAM

jumlah beras diberikan kepada keluarga miskin setiap bulan.

2 KAMPIT

beras Super Tempatan (ST) lima peratus setiap bulan.

[FOTO ASYRAF HAMZAH/BH]



Tajuddin mengambil juadah kepada tetamu ketika majlis Sambutan Hari Raya LKIM di Wisma LKIM, Seri Kembangan, semalam.